



Lugo, a 19 de xullo de 2012. Con motivo de se cumpriren dous anos da súa constitución, o **Foro do Camiño Primitivo**

, do que fai parte ADEGA, celebrou unha

assemblea xeral

para analizar a evolución do estado de conservación e protección desta milenaria calzada medieval. Malia a que hai dous anos o Foro xa alertaba á Xunta de Galiza da

necesidade urxente de proceder á delimitación oficial

deste primeiro camiño de peregrinación a Compostela, os membros do Foro veñen de constatar que desde aquela a Xunta aínda non deu ningún paso cara a esa dirección, permitindo que o Camiño Primitivo siga a sufrir un elevado grao de ameaza ambiental e de agresión ao seu patrimonio cultural. Así mesmo, esixe como

principios irrenunciábeis na delimitación

da vía a autenticidade histórica, a recuperación da súa traza antiga e a protección de ámbito BIC (Ben de Interese Cultural).

Este **proceso de delimitación**, que podería asegurar a preservación da súa traza física e do seu territorio histórico, **agora faise apremiante** debido a que a UNESCO está a analizar o expediente da candidatura do Camiño Primitivo para ser proclamado como

Patrimonio Mundial

. Hai que lembrar que esta candidatura xa foi anunciada a comezos do ano pasado por parte do Consello de Patrimonio Histórico Español, momento no que o Foro volveu a reincidir na importancia de delimitar o Camiño. Aínda así, a día de hoxe aínda non se coñece unha soa actuación que a Xunta teña realizado para este fin.

